

## 3802 購買經過及小評

擒晚[2002.01.28] 部 3802 終於到手, 先簡述買機經過, 可給有心人作為參考.

首先上星期六晏晝去豐澤打算撲鎚買 3802 (個價係 \$6780, 2802 就 \$5580, 797 就 \$6580), 如果咁睇就揀 3802, 因為打算分期買, 都係一個月一百蚊既分別. 好喇, 去到豐澤之後, 直衝入佢個影音房 (唔多豐澤有), 一睇, 死火, 好似唔見左早幾日放係度既 3802, 一問個哥仔, 佢話, 係丫 3802 要訂丫, 我個心一沉, 心諗, 唔係丫嘛, 線都買好晒, 忍左幾日無機爆, 黎到又有貨 ???

跟手再問問, 買部咁貴既機仲有冇得平丫 ?? 因為早前成日去睇 d sales 都話睇 o 岩仲可以計平少少, 佢話要去 check check, 之後返黎話有 5% discount, 心諗, 都抵既, 每月供 ( $\$6780 \times 0.95$ ) / 12 = \$536.75, 跟住問埋平左都可以免息分期架呵??? 個 sales 話係!! 咁我話好, 咁如果而家落 order 幾時有?? 佢就答星期二可以送貨去你度, 我記得送貨係會遲少少, 我話送落你地舖我自己黎囉有冇得早, 佢話星期一傍晚應該 ok.

好喇, 傾到好 o 岩就準備去收銀處理單, 去到話要做分期, 手囉張中銀出黎之際, 個 sales 話.... 唔好意思丫先生, 中銀無得分, 咁我話咁邊張有, 佢答 Chase 同恆生(唔記得係恆生定第張), 我話咁 citibank 呢?(以前有), 佢話我地無做 citibank 個張喇. 我話, 咁好大問題喎, 我諗住用卡分期唔使俾額外錢兼近我屋企先係你度買. 跟住我即刻想打退堂鼓, 要俾晒我使貴係你度買仲要等!! 於是正想一係去第二度買, 跟住個 sales 就話一係再計你平 d 等你一次過俾都無咁傷, 我話幾多, 佢又襟一輪機, 最尾就由 5% 變成 10% discount, 我諗左一陣, 計一計  $\$6780 \times 0.9 = \$6102$ , 咁又抵喎, 同旺角個 d 差不多價喇, 咁於是就一炮過攞左佢.

漫長既星期六日好快咁又過去左, 星期一晚打電話去佢話到左我就第一時間撲左去, 手捧部約 20kg 既機, 一臉滿足感咁拿拿聲返到屋企 (10 分鐘路程).

返到去第一時間剝佢光豬啦, 雖然個外型就普通左少少, 不過對於未擁有過 Denon 機既我黎講, 都算幾靚仔!!! 最緊要終於都有部有 DTS 既 amp 喇!! 嗚嗚~~~~ 唔好意思, 鬼叫當初買部 amp 冇耐佢就出 DTS, 真係企左係度.

由於時間已經唔早, 為左快快試機, 就諗住插晒 d 線, 先試晒 7.1, surround A/B, 前左中右 全部有聲出先啦, 一間有乜依郁又要搬去換丫嘛, 由於之前諗住買機但未買到, 所以 d 接線已經一早準備好晒!!! 好喇, 各位觀眾, 一野插蕉插入 amp 係好過癮既 (因為之前用夾線, 夾到手抽筋!) 嘍, 點解隊唔入既??? 無理由架, 蕉插喎, 無理由插左窿喎, 再睇真 d, 點解個窿有粒野頂住.....心諗, 唔係丫嘛, 用唔到蕉 ???????????

忽然個腦靈光一閃, 記得有網友話 2802 中間又係有粒野要挑, 結果終於奮鬥左十零分鐘, 挑

晒 d 野出黎!! 拿拿聲插入去, 再用個 remote 試下 Test Tone 先, 咦, 點解襟完冇反應 ?? 唔係又壞丫, 拿拿聲又試下 remote 其他掣, 咦, 又有反應架喎, 唔好理住, 最尾去 OSD 度測試, 好喇攞一大輪所有聲都有, 就試下用部 q50 試碟喇!!!

登登登登, 當時既情況係, Q50 P.Scan 直入 Projector, Coaxial 入 Amp, 另外有紅白線都入 Amp, 想分別試下用 Q50 解碼及 Amp 解碼既分別.

先講戲先, 當然要用 Coaxial 啦, 就係條 SilverSonic 喇, 囉左隻 Gladiator 試, 喇叭用緊之前既 AR 喇叭(可以 avbuzz.com 參考 John Lau 器材), 加 AR 中置, 線就換晒 QED Silver Anniversary 架喇. 開第二幕啦, 當時已 set 好晒 d speaker 既距離, 同埋輕輕調較左 d 大細聲, 黎到 Gladiator 呢幕, 記得係網友度試, d 聲係好勁, 尤其係 subwoofer 出同後置 d 箭聲等等, 自己細心要作比較, 因為暫時未有 subwoofer, d 低頻都係個 AR 前置出, 好明顯就有左個種震撼人心既力量. 不過 d bass 都勉強可以接受, 雖則加個 subwoofer 都一定會, 但暫時都 ok, 亦都感受到 Denon 出 bass 係唔使同佢擔心, 同埋 d 喇叭似乎都仲頂得住下. 出黎既效果係比我預期中好 (睇埋一間另一隻就知).

攞左一輪後, 又試下另一隻碟, 劉德華演唱會, 係....係...無錯, 華仔演唱會用黎試機?? 係丫, 又係上次網友試, 出乎意料地, 華仔隻碟 d bass 真係好勁!! 係網友度第一 cut 深藍, 開頭 d bass 真係震到入心!!! 好喇, 又返黎我部 Denon 先, 大家無走住, 最多我快 d 入題, 我即刻較去深藍, 開始喇.....唔, d bom bom 聲都出到黎, 不過已經無震到我入心既感覺, 無計, 一對書檯喇叭要出 bass, 其實佢都叫交足功課架喇, 鬼叫聽過好野, 梗係要求高少少啦, 但係又出乎我意料, 雖然無震到入心, 但係我間咁既房子到, 都叫左 ok 喎, 當然我好期待加埋 subwoofer 後既情況啦. 試埋第二 cut d bass 真係幾勁, 同埋我覺得中置 d 聲都幾清楚, 我自己唔係太識聽, 不過如果咪埋眼的話, 我都覺得 d 聲環繞住我, 不過 bass 方面就覺得少少係焗係個 speaker 入便, 可能係駐波個 d 問題掛??

好喇, 試左兩隻 DVD, 暫時黎講對 d 線同部 amp 都好滿意, 鬼咩, 都有得比較, 之前用雞線同第二部 amp, 自己都好難去比較, 跟手搵隻 SACD 黎試下聲喇.

一隻我都唔知叫乜名既 SACD (可放落普通 CD 機播), 上次係另一網友度試既, d 中國樂器聲好清脆, 佢用部 989, 真係無敵咁滯, 黎到我呢度又點呢.....唔..唔...賣個關子先....下??? 唔睇?? 唔好唔好, 我即刻講埋落去...唔食 lunch 都講....

我地試下啦, 先用部 amp 解碼, 轉去用 coaxial 啦, 唔, 點講好呢, d 聲都好清脆, 但係好似有 d 高音無左咁樣, 當然 bass 我又唔太擔心, 根本就無得擔心, 但係如果要比較, 當然 989 + SACD 播出黎既效果一定好好多, 但另一網友發覺有時會有少少雜聲出左黎(何解又多左個人?? 無錯, 其實一直都係有個人係度, 前文無講遮), 我自己都覺得有時有 d 聲好似出唔到, 嗚嗚聲咁, 我相信可能係隻喇叭頂唔住(希望高手賜教), 唔知係咪 d bass 出晒去頂唔順(前置 set 左

large). 不過唔緊要, 繼續試, 跟手用 Q50 解碼經 紅白線入 amp, 感覺上好似大聲左(相同 volume), 我唔知丫, 我覺得咋, 其實就咁聽真係分別不大, 不過心理上可以玩多樣野, 話俾人知 amp 解碼同 q50 解碼我都試齊, 好似好 pro 咁, 我諗如果搵個 pro 既人黎試, 應該聽得出有乜分別既, 我自己對耳就真係唔太覺個分別. 我又播下好鍾意既范曉萱隻絕世名伶, 同我之前用 yamaha 機聽黎比較, 個 bass 又好似勁左少少, 但如果以我平時都係聽 pop 既話, 我覺得都收貨架喇(無計架喇, 自己件野點都有 d 偏差架喇...)

終於都試好晒之後, 其實暫時黎講對佢都好滿意, 尤其個 remote, 真係好好彩, 無買到 2802, d 人話 2802 remote 係佢 weakest link, 3802 既 remote, 初初睇都幾老土, 又黑古勒突, 不過用開都算方便, 同埋以前 yamaha 個隻唔知係咪我蠢, 攪極都唔識用佢個 learn function, 而家個隻我睇睇說明書, 之後就成功 learn 左錄影機個遙控喇, 後尾又發覺 Test Tone 要點先用到...呵呵, 不過我學 cable 個遙控, 佢話成功但我襟左都有反應, 未知點解住.

仲有一樣未講, 之前我就話 Q50 P.scan 直入 Projector, 而個時 PS2 就色差入 Amp 再係 Amp 色差 out 出, 準備兩邊咁換, 但經過另一網友話時攞時插對個頭同個座都有影響, 係要訓覺之前, 都係試下, 反正色差都係 Q50 同 PS2 一齊用(之前想用 PS2 Svideo 去晶彩倍線王再用 VGA 入 Projector, 但試完效果太差, 放棄呢個方法). 於是把心一橫, 將 Q50 p.scan out 去 Amp 度, 兩個色差入, projector 色差就插入 Amp 既色差 output, 大告功成, 拿拿聲再用 Gladiator 睇睇, 睇左一兩分鐘覺得畫面唔覺有分別, 好, 過到自己個關咁就可以 fix 晒 d input, 唔使再成日攞線插線轉黎轉去, 而家仲方便, 一襟 DVD 個掣就會用 DVD 色差同 Coaxial, 一襟 TV 就去 PS2, 太方便!!!!!!!

我見到個 remote 仲有個按一鍵又開 amp 又開 dvd 等等(我諗類似 Macro 功能), 等我又睇睇點攞, 之後就算阿媽要用叫佢襟一個掣開 amp, DVD, projector 咁就方便好多喇.

以上意見都係自己個人觀感, 同埋要多謝另一網友幫手!!!

謝謝大家觀賞.